

No. 45. 1365. 4. Oct.

*Richter, Burgermeister und Rath beurkunden, dass sie mit Zustimmung der Bürgerschaft angeordnet haben, dass die Messe an dem Apostelaltare in der Pfarrkirche zu der in der Stadt Briefe (No. 39) angegebenen Tageszeit gelesen werde.*

Wir Albrecht von Vrownsteyn richter czu Pyrn, Heyneman Store burgermeister, Nickel Grozze, Nickel Welyn, Pesch Cleman, Peczolt Grebener, Hannus Manewicz, Nickel Veiste der iunge, Otto von Radeberg, Nickel Hellembrecht, Nickel Kutel, Peter Meyneke, Heynich Beer gesworne ratmanne der stat Pyrn bekennen —, daz vor vns komen ist in vollen rat her Johans Melling, der beleser ist dez alters der heiligen zwelfboten in vnser pfarrkirchen, vnd hat vor vns bracht vnser stat brif, daz her sine messe ob dem altar oder welchem prister her geburt zu belesen lesen sal sumerczit alz man metten zu samene lütet vnd winterzeit alz der tag an brichet; alzo haben wir den vorgeanten hern Johans Melling geheizen di messe lesen beide sumerczeit vnd winterzeit nach vnser stat brife lüte, vnd haben daz getan mit der burger rat, di vor vns gesessen sint in dem rat, vnd ouch mit der gemeyne rate beide arm vnd riche. Weris daz der vorbeschriben her Johans oder welch prister dez altars beleser were von ymande würde czü rede gesaczt von weme daz were vm di messe, daz wöllen vnd süllen der rat vnd di gemeyne den egenanten hern Johans oder den beleser dez altars vor entwürten vnd entwerren, ob em daz ymmer durft geschege oder wo ym dez not geschege, geyn weme daz were. Dez zu eyner bevestigunge vnd zu eyne ewigen bekentnisse diser vorbeschriben sache haben wir vnser stat insigel lazzen anhangen disem offen brife, der gegeben ist nach gotez geburte tusent iar drihundert iar dar nach in dem fünf vnd sechzigstem iare dez sunabendez nach sanct Michels tage.

Nach dem Orig. im Rathsarchiv zu Pirna. Das an einem Pergamentstreifen befestigt gewesene Stadtsiegel ist abhanden gekommen.

No. 46. 1373. 29. März.

*Kaiser Karl IV. bestimmt, dass der Wochenmarkt zu Pirna nach wie vor ungeachtet des von der Stadt Aussig erhobenen Widerspruchs am Dienstag abgehalten werden soll.*

Wir Karl von gots gnaden Romischer keiser zu allen zeiten merer des reichs vnd kunig zu Beheim bekennen vnd tun kunt offenlichen mit diesim brieue allen den, die yn sehent oder horent lesen, vmb sulche sachen vnd czweyungen, die do gewesin sein zwischen vnsern lieben getrewen den burgern vnd der stat zu Pyrn an einem teil vnd den burgern vnd stat zu Vsk an dem andern von des wochenmarktes wegen, das wir sie in solicher masse entscheiden haben vnd entscheiden mit diesim brieue, das die egenanten vnsir burger von Pirn iren wochenmarkt furbas halten vnd haben sullen vff den dynstag allewochenlichen, als das von alter her gewonlichen gewest ist, vnd doran sullen yn vnschedlichen sein sulche brieue, die wir der stat